

ქალაქ თბილისის მუნიციპალიტეტის საკრებულოს

დადგენილება №33-141

2015 წლის 29 დეკემბერი

ქ. თბილისი

ქალაქ თბილისის მუნიციპალიტეტის მერიის საჯარო სამართლის იურიდიული პირის – ცხოველთა მონიტორინგის სააგენტოს მიერ გაწეული ცალკეული მომსახურების საფასურის განსაზღვრის წესის შესახებ

საქართველოს ორგანული კანონის „ადგილობრივი თვითმმართველობის კოდექსის“ 61-ე მუხლის მე-2 პუნქტისა და 79-ე მუხლის მე-4 პუნქტის შესაბამისად, ქალაქ თბილისის მუნიციპალიტეტის საკრებულო ადგენს:

1. დამტკიცდეს ქალაქ თბილისის მუნიციპალიტეტის მერიის საჯარო სამართლის იურიდიული პირის – ცხოველთა მონიტორინგის სააგენტოს მიერ გაწეული ცალკეული მომსახურების საფასურის განსაზღვრის თანდართული წესი.
2. დადგენილება ამოქმედდეს გამოქვეყნებისთანავე.

ქალაქ თბილისის მუნიციპალიტეტის
საკრებულოს თავმჯდომარე

გიორგი ალიბეგაშვილი

დანართი

ქალაქ თბილისის მუნიციპალიტეტის მერიის საჯარო სამართლის იურიდიული პირის – ცხოველთა მონიტორინგის სააგენტოს მიერ გაწეული ცალკეული მომსახურების საფასურის განსაზღვრის წესი

მუხლი 1. რეგულირების სფერო

1. „ქალაქ თბილისის მუნიციპალიტეტის მერიის საჯარო სამართლის იურიდიული პირის – ცხოველთა მონიტორინგის სააგენტოს მიერ გაწეული ცალკეული მომსახურების საფასურის განსაზღვრის წესი“ (შემდგომში - წესი) განსაზღვრავს ქალაქ თბილისის მუნიციპალიტეტის მერიის საჯარო სამართლის იურიდიული პირის – ცხოველთა მონიტორინგის სააგენტოს (შემდგომში – სააგენტო) მიერ გაწეული ცალკეული მომსახურების საფასურის განაკვეთებს, ასევე საფასურის გადახდის, გადახდისაგან გათავისუფლების და გადახდილი საფასურის დაბრუნების წესსა და პირობებს.
2. მომსახურება, რომელიც არ რეგულირდება ამ წესით და მისი განხორციელება, მოქმედი კანონმდებლობის შესაბამისად, წარმოადგენს სააგენტოს ვალდებულებას, ხორციელდება უსასყიდლოდ.

მუხლი 2. საფასურის ცნება

საფასური არის ფიზიკური/იურიდიული პირის (შემდგომში – პირი) მიერ ამ წესით დადგენილი ოდენობით, სააგენტოს მიერ გაწეული მომსახურების მისაღებად, მის ანგარიშზე გადასახდელი სავალდებულო თანხა.

მუხლი 3. საფასურის დაწესება და მისი ოდენობის განსაზღვრა

1. საფასურის შემოღება და მისი ოდენობის განსაზღვრა ხდება ამ წესით.
2. ამ წესით დადგენილი საფასური მოიცავს მომსახურების გაწევისათვის საჭირო ყველა პირდაპირ და არაპირდაპირ ხარჯებს (მათ შორის: გადასახადებს).

მუხლი 4. მომსახურება

1. მომსახურება ამ წესის მიზნებისთვის გულისხმობს, სააგენტოს მიერ კანონმდებლობით მინიჭებული კომპეტენციის ფარგლებში, ამ წესით განსაზღვრული საფასურის გადახდის საფუძველზე განხორციელებულ ქმედებას.
2. სააგენტოს დირექტორი უფლებამოსილია განსაზღვროს მომსახურების მიღების განაცხადებზე



რეაგირების პარამეტრები, მომსახურების გაწევის განრიგი და მომსახურების მიღების მსურველთა რიგითობის წესი.

3. სააგენტო თავის უფლებამოსილებას ახორციელებს კანონმდებლობით დადგენილი წესით.

მუხლი 5. ცხოველების ტრანსპორტირება

1. ამ წესის მიზნებისთვის:

ა) ტრანსპორტირება გულისხმობს, სააგენტოს უფლებამოსილი თანამშრომლების მიერ სპეციალური ავტოტრანსპორტით, პირის განცხადების და ამ წესით განსაზღვრული საფასურის გადახდის საფუძველზე განხორციელებულ ქმედებებს, რომლებიც მოიცავს პირის საკუთრებაში/მფლობელობაში არსებული ცხოველის/ცხოველის ლემის ტრანსპორტირებას პირის მიერ მითითებული საწყისი პუნქტიდან დანიშნულების ადგილამდე, ტრანსპორტირების მანძილის და მოლოდინის/დაყოვნების პერიოდის გათვალისწინებით;

ბ) ტრანსპორტირების მანძილის საზომად გამოიყენება 1 კილომეტრი;

გ) მოლოდინი გულისხმობს, სააგენტოსა და პირს შორის წინასწარი შეთანხმებით განსაზღვრულ, პირის მიერ მითითებულ საწყის ან შუალედურ პუნქტში ლოდინის საერთო დროს;

დ) დაყოვნება გულისხმობს, ტრანსპორტირების პროცესში წინასწარი შეთანხმების გარეშე პირის თხოვნის საფუძველზე დამატებულ დროს, რომელიც აღემატება სააგენტოსა და პირს შორის წინასწარი შეთანხმებით განსაზღვრულ, პირის მიერ მითითებულ საწყის ან შუალედურ პუნქტში ლოდინის საერთო დროს;

ე) მოლოდინის/დაყოვნების პერიოდის საზომად გამოიყენება 10 წუთი;

ვ) მოლოდინის/დაყოვნების პერიოდის ათვლა იწყება პირველი 10 წუთის გასვლის შემდეგ;

ზ) მოლოდინის/დაყოვნების დაშვებული საერთო მაქსიმალური პერიოდი შეადგენს 120 წუთს.

2. სააგენტოს მიერ პირის საკუთრებაში/მფლობელობაში არსებული ცხოველების ერთჯერადი ტრანსპორტირების საფასური შეადგენს:

ა) ძაღლის, კატის შემთხვევაში – 2 ლარს – 1 კილომეტრის მანძილზე, დამატებული ტრანსპორტის ერთჯერადი დეზინფექციის საფასური – 5 ლარი;

ბ) წვრილფეხა პირუტყვის შემთხვევაში – 4 ლარს – 1 კილომეტრის მანძილზე, დამატებული ტრანსპორტის ერთჯერადი დეზინფექციის საფასური – 5 ლარი;

გ) მსხვილფეხა პირუტყვის შემთხვევაში – 6 ლარს – 1 კილომეტრის მანძილზე, დამატებული ტრანსპორტის ერთჯერადი დეზინფექციის საფასური – 10 ლარი.

2¹. სააგენტოს მიერ პირის საკუთრებაში/მფლობელობაში არსებული ცხოველების ლემის ერთჯერადი ტრანსპორტირების საფასური შეადგენს:

ა) ერთი ერთეული ძაღლის შემთხვევაში 60 ლარს, კატის შემთხვევაში – 40 ლარს, დამატებული ტრანსპორტის ერთჯერადი დეზინფექციის საფასური – 5 ლარი;

ბ) ერთი ერთეული წვრილფეხა პირუტყვის შემთხვევაში – 60 ლარს, დამატებული ტრანსპორტის ერთჯერადი დეზინფექციის საფასური – 5 ლარი;

გ) ერთი ერთეული მსხვილფეხა პირუტყვის შემთხვევაში – 180 ლარს, დამატებული ტრანსპორტის ერთჯერადი დეზინფექციის საფასური – 20 ლარი.

3. სააგენტოს მიერ პირის საკუთრებაში/მფლობელობაში არსებული ცხოველის ტრანსპორტირებისას მოლოდინის/დაყოვნების საფასური შეადგენს 2 ლარს - 10 წუთში.

4. მხოლოდ პირის განცხადების საფუძველზე, სააგენტო უფლებამოსილია მოახდინოს ცხოველის ტრანსპორტირება შუალედურ პუნქტებში, ტრანსპორტირების მარშრუტის ცვლილება (გაზრდა), ან დაბრუნება დანიშნულების ადგილიდან საწყის პუნქტში, ტრანსპორტირების მანძილის, მოლოდინის/დაყოვნების დროის გათვალისწინებით და შესაბამისი საფასურის გადახდის საფუძველზე.

ქალაქ თბილისის მუნიციპალიტეტის საკრებულოს 2017 წლის 19 მაისის დადგენილება №10-43 - ვებგვერდი, 23.05.2017 წ.

ქალაქ თბილისის მუნიციპალიტეტის საკრებულოს 2026 წლის 24 მარტის დადგენილება №10-19 - ვებგვერდი, 25.03.2026 წ.



მუხლი 6. ცხოველების იდენტიფიკაცია

1. ცხოველების იდენტიფიკაცია ამ წესის მიზნებისთვის გულისხმობს სააგენტოს უფლებამოსილი თანამშრომლების მიერ, სპეციალური ავტოტრანსპორტით (პირის მიერ მითითებულ მისამართზე (შემდგომში - მისამართი)) ან მის გარეშე (სააგენტოს ცხოველთა თავშესაფარში (შემდგომში - თავშესაფარი)), პირის განცხადებისა და ამ წესით განსაზღვრული საფასურის გადახდის საფუძველზე განხორციელებულ ქმედებებს, რომლებიც მოიცავს პირის საკუთრებაში/მფლობელობაში არსებული ცხოველის:

ა) სხეულში მიკრო-ჩიპის ინპლანტაციას (შემდგომში ჩიპირება);

ბ) კანზე ტატუს დატანას (შემდგომში ტატუირება);

გ) საჭდის („საყურე ნიშნის“) მიმაგრებას.

2. სააგენტოს მიერ პირის საკუთრებაში/მფლობელობაში არსებული ცხოველების იდენტიფიკაციის საფასური განისაზღვრება შემდეგნაირად:

ა) ჩიპირება:

ა.ა) თავშესაფარში - 19 ლარი;

ა.ბ) მისამართზე - 32 ლარი;

ბ) ტატუირება:

ბ.ა) თავშესაფარში - 1 ლარი;

ბ.ბ) მისამართზე - 14 ლარი;

გ) საჭდის მიმაგრება:

გ.ა) თავშესაფარში - 3 ლარი;

გ.ბ) მისამართზე - 16 ლარი.

3. ქალაქ თბილისის მუნიციპალიტეტის ტერიტორიაზე სოციალურად დაუცველი ოჯახების მონაცემთა ერთიან ბაზაში რეგისტრირებული ოჯახის წევრის საკუთრებაში ან მფლობელობაში არსებული ცხოველების ამ მუხლით გათვალისწინებული იდენტიფიკაცია - ტატუირებით, სააგენტოს მიერ ხორციელდება უსასყიდლოდ, წინასწარი განაცხადის საფუძველზე.

4. (ამოღებულია - 24.03.2026, №10-19).

ქალაქ თბილისის მუნიციპალიტეტის საკრებულოს 2017 წლის 24 თებერვლის დადგენილება №3-17 - ვებგვერდი, 01.03.2017 წ.

ქალაქ თბილისის მუნიციპალიტეტის საკრებულოს 2026 წლის 24 მარტის დადგენილება №10-19 - ვებგვერდი, 25.03.2026 წ.

მუხლი 6¹. ცხოველების დაჭერა-გაყვანა

1. ცხოველების დაჭერა-გაყვანა ამ წესის მიზნებისთვის გულისხმობს სააგენტოს უფლებამოსილი თანამშრომლების მიერ, სპეციალური აღჭურვილობით და ავტოტრანსპორტით, პირის განცხადებისა და ამ წესით განსაზღვრული საფასურის გადახდის საფუძველზე განხორციელებულ ქმედებებს, რომლებიც მოიცავს უმეტესადაც ცხოველების:

ა) დაჭერას, საქართველოს კანონმდებლობით დადგენილი მეთოდებით;

ბ) გაყვანას ტერიტორიიდან, საქართველოს კანონმდებლობით დადგენილი მეთოდებით;

გ) გაშვებას მიმდებარე ან სხვა მიზანშეწონილ ტერიტორიაზე, ან საქართველოს კანონმდებლობით გათვალისწინებულ სხვა ღონისძიებებს.



2. დაჭერა-გაყვანას ექვემდებარებიან მხოლოდ ის ცხოველები, რომელთა დაჭერა სცილდება საქართველოს კანონმდებლობით დადგენილ ცხოველთა სავალდებულო დაჭერის საფუძვლებს, მაგრამ მესაკუთრეს არ სურს უმეთვალყურეო ცხოველების ყოფნა მის საკუთრებაში არსებულ ტერიტორიაზე (გარდა ბინათმესაკუთრეთა ამხანაგობების საერთო საკუთრებაში არსებული ტერიტორიისა).

3. სააგენტო არ აგებს პასუხს ამ მუხლის საფუძველზე დაჭერილი და ტერიტორიიდან გაყვანილი ცხოველების იგივე ტერიტორიაზე დაბრუნების შემთხვევაში და მათი გაყვანისთვის გადახდილი საფასური უკან დაბრუნებას არ ექვემდებარება.

4. სააგენტოს მიერ ცხოველების დაჭერა-გაყვანის საფასური განისაზღვრება შემდეგნაირად:

ა) ძაღლის დაჭერა-გაყვანა – 60 ლარი;

ბ) კატის დაჭერა-გაყვანა – 50 ლარი;

გ) მსხვილფეხა პირუტყვის დაჭერა-გაყვანა – 150 ლარი;

დ) წვრილფეხა პირუტყვის დაჭერა-გაყვანა – 100 ლარი.

5. ამ მუხლით განსაზღვრული ცხოველების დაჭერა-გაყვანის საფასური არ ვრცელდება ბინათმესაკუთრეთა ამხანაგობის წევრთა საერთო ქონებიდან დასაჭერ/გასაყვან უმეთვალყურეო ცხოველებზე.

ქალაქ თბილისის მუნიციპალიტეტის საკრებულოს 2017 წლის 24 თებერვლის დადგენილება №3-17 - ვებგვერდი, 01.03.2017 წ.

ქალაქ თბილისის მუნიციპალიტეტის საკრებულოს 2026 წლის 24 მარტის დადგენილება №10-19 - ვებგვერდი, 25.03.2026 წ.

მუხლი 6². რეპელენტით ტერიტორიის დამუშავება

1. რეპელენტით ტერიტორიის დამუშავება ამ წესის მიზნებისთვის გულისხმობს სააგენტოს უფლებამოსილი თანამშრომლების მიერ სპეციალური აღჭურვილობით და პრეპარატებით, პირის განცხადებისა და ამ წესით განსაზღვრული საფასურის გადახდის საფუძველზე, განხორციელებულ ქმედებებს, რომლებიც მოიცავს:

ა) ტერიტორიის, შენობა-ნაგებობების და სათავსოების დათვალიერება-შესწავლას;

ბ) ჩასატარებელი სამუშაოების შინაარსის, სახეობების, მოცულობის და გრაფიკის განსაზღვრას, გეგმის შედგენას და მის შეთანხმებას პირთან;

გ) ქვეწარმავლების საწინააღმდეგო სპეციალური პრეპარატებით, დამაფრთხობლებით და სხვა ქმედებებით ტერიტორიის, შენობა-ნაგებობების და სათავსოების დამუშავებას;

დ) დამუშავების პროცესში დაფიქსირებული ქვეწარმავლების დაჭერას.

2. დაჭერას ექვემდებარებიან მხოლოდ ის ქვეწარმავლები, რომელთა დაჭერა სცილდება საქართველოს კანონმდებლობით დადგენილ ცხოველთა სავალდებულო დაჭერის საფუძვლებს.

3. ამ მუხლის პირველი პუნქტის „ბ“ ქვეპუნქტით განსაზღვრული გეგმის შედგენის პროცესში, აუცილებელია საქართველოს გარემოსა და ბუნებრივი რესურსების დაცვის სამინისტროს სისტემაში შემავალი საჯარო სამართლის იურიდიული პირის – გარემოს ეროვნული სააგენტოს ჰიდრომეტეოროლოგიური დეპარტამენტისგან (შემდგომში – ჰიდრომეტეოროლოგიური დეპარტამენტი) მიღებული ჰიდრომეტეოროლოგიური პროგნოზის გათვალისწინება.

4. ამ მუხლის პირველი პუნქტის „ბ“ ქვეპუნქტით განსაზღვრული ღონისძიებების შედეგად დგინდება ჩასატარებელი სამუშაოების შესაბამისი კატეგორია:

ა) „პირველი კატეგორია“, რაც ამ წესის მიზნებისთვის გულისხმობს ქვეწარმავლების საწინააღმდეგო სპეციალური პრეპარატებით, სასხურებელი აპარატის საშუალებით, წერტილოვანი ან ხაზობრივი დასხურების მეთოდით, პრეპარატის შესხურებას წვრილი ჭავლით ან გამაფრქვევლით, დასაცავი



ტერიტორიის, შენობა-ნაგებობების და სათავსოების გარშემო, წინასწარ განსაზღვრულ პერიმეტრზე;

ბ) „მეორე კატეგორია“, რაც ამ წესის მიზნებისთვის გულისხმობს ამ მუხლის მე-3 პუნქტის „ა“ ქვეპუნქტით გათვალისწინებული ღონისძიებების ჩატარებას შენობა-ნაგებობებში და მათ სარდაფებში, სხვენებზე, საწყობებში, სხვა, სამეურნეო და დამხმარე დანიშნულების ნაგებობებში;

გ) (ამოღებულია - 24.03.2026, №10-19);

დ) (ამოღებულია - 24.03.2026, №10-19).

5. სააგენტო არ აგებს პასუხს ამ მუხლის საფუძველზე გაწეული მომსახურების შედეგებზე, თუ ამ მომსახურების მიწოდების პროცესში ან მომსახურების მიწოდების შემდგომ სამი დღის განმავლობაში შეიცვალა ამ მუხლის მე-2 პუნქტის საფუძველზე დადგენილი ჰიდრომეტეოროლოგიური პროგნოზის პარამეტრები და ტერიტორიაზე ატმოსფერული ნალექის შედეგად შესუსტდა ან სრულად განეიტრადა ჩატარებული ღონისძიებების ეფექტი.

6. სააგენტოს მიერ რეპელენტით ტერიტორიის დამუშავების საფასური, სამუშაოების კატეგორიების მიხედვით, ერთი კვადრატული მეტრის ფართობზე განისაზღვრება შემდეგნაირად:

ა) პირველი კატეგორიის სამუშაოები – 1 ლარი;

ბ) მეორე კატეგორიის სამუშაოები – 2 ლარი;

7. სააგენტოს მიერ ამ მუხლის მიზნებისთვის ქვეწარმავლების დაჭერის საფასური შეადგენს 30 ლარს ერთ დაჭერილ ქვეწარმავალზე.

8. სააგენტოს მიერ, ამ მუხლის მიზნებისთვის „მიმდინარე და სამი მომდევნო დღის ჰიდრომეტეოროლოგიური პროგნოზის“ საფასური დგინდება ჰიდრომეტეოროლოგიური დეპარტამენტის მიერ.

9. სააგენტოს მიერ ერთი პირის საერთო ტერიტორიის რეპელენტით დამუშავების მომსახურების საერთო საფასური შედგება:

ა) საერთო ტერიტორიის სხვადასხვა ნაწილებში სამუშაოების კატეგორიების შესაბამისად შესრულებული ცალკეული სამუშაოების საფასურის ჯამისგან;

ბ) დაჭერილი ქვეწარმავლების რაოდენობის მიხედვით, რეპელენტით დამუშავებულ საერთო ტერიტორიაზე ქვეწარმავლების დაჭერის საფასურისგან;

გ) „მიმდინარე და სამი მომდევნო დღის ჰიდრომეტეოროლოგიური პროგნოზის“ საფასურისგან.“.

ქალაქ თბილისის მუნიციპალიტეტის საკრებულოს 2017 წლის 24 თებერვლის დადგენილება №3-17 - ვებგვერდი, 01.03.2017 წ.

ქალაქ თბილისის მუნიციპალიტეტის საკრებულოს 2018 წლის 25 მაისის დადგენილება №19-65 - ვებგვერდი, 28.05.2018 წ.

ქალაქ თბილისის მუნიციპალიტეტის საკრებულოს 2026 წლის 24 მარტის დადგენილება №10-19 - ვებგვერდი, 25.03.2026 წ.

მუხლი 6³. ვეტერინარული მომსახურება

1. ვეტერინარული მომსახურება ამ წესის მიზნებისთვის გულისხმობს სააგენტოს უფლებამოსილი თანამშრომლების მიერ, სპეციალური ავტოტრანსპორტით (პირის მიერ მითითებულ მისამართზე (შემდგომში - მისამართი)) ან მის გარეშე (სააგენტოს ცხოველთა თავშესაფარში (შემდგომში - თავშესაფარი)), პირის განცხადებისა და ამ წესით განსაზღვრული საფასურის გადახდის საფუძველზე განხორციელებულ ქმედებებს, რომლებიც მოიცავს ცხოველების:

ა) სტერილიზაციის ოპერაციას (თავშესაფარში);

ბ) კასტრაციის ოპერაციას (თავშესაფარში);

გ) ანტირაბიულ ვაქცინაციას (თავშესაფარში ან მისამართზე);

დ) კომპლექსურ ვაქცინაციას (თავშესაფარში ან მისამართზე).

2. სააგენტოს მიერ ვეტერინარული მომსახურების საფასური განისაზღვრება შემდეგნაირად:



ა) სტერილიზაციის ოპერაცია – 100 ლარი;

ბ) კასტრაციის ოპერაცია – 80 ლარი;

გ) ანტირაბიული ვაქცინაცია:

გ.ა) თავშესაფარში – 20 ლარი;

გ.ბ) მისამართზე – 40 ლარი;

დ) კომპლექსური ვაქცინაცია:

დ.ა) თავშესაფარში – 30 ლარი;

დ.ბ) მისამართზე – 50 ლარი.

3. ქალაქ თბილისის მუნიციპალიტეტის ტერიტორიაზე სოციალურად დაუცველი ოჯახების მონაცემთა ერთიან ბაზაში რეგისტრირებული ოჯახის წევრის საკუთრებაში ან მფლობელობაში არსებული ცხოველების ამ მუხლით გათვალისწინებული ანტირაბიული ვაქცინაცია თავშესაფარში სააგენტოს მიერ ხორციელდება უსასყიდლოდ, წინასწარი განაცხადის საფუძველზე.

ქალაქ თბილისის მუნიციპალიტეტის საკრებულოს 2017 წლის 19 მაისის დადგენილება №10-43 - ვებგვერდი, 23.05.2017 წ.

ქალაქ თბილისის მუნიციპალიტეტის საკრებულოს 2026 წლის 24 მარტის დადგენილება №10-19 - ვებგვერდი, 25.03.2026 წ.

მუხლი 7. მომსახურების პირობები და ვადის გამოთვლა

1. სააგენტოს მიერ ამ წესით დადგენილი მომსახურების შესასრულებლად სააგენტო უფლებამოსილია, პირთან გააფორმოს შესაბამისი ხელშეკრულება, რომელშიც მითითებული იქნება მომსახურების განხორციელების ვადები და ტექნიკური პირობები.

2. ამ წესით დადგენილი მომსახურების განხორციელების მიზნით:

ა) პირი უნდა დაუკავშირდეს სააგენტოს ტელეფონით ან სხვა ელექტრონული საშუალების (ვებგვერდი, სპეციალური ელექტრონული პროგრამა და ა.შ.) მეშვეობით და გამოთქვას მომსახურების მიღების სურვილი;

ბ) სააგენტოს შესაბამისი ოპერატორი პირს ტელეფონით ან სხვა ელექტრონული საშუალების (ვებგვერდი, სპეციალური ელექტრონული პროგრამა და ა.შ.) მეშვეობით მიაწოდებს ინფორმაციას გასაწევი მომსახურების პირობებისა და საფასურის ოდენობის შესახებ;

გ) პირის მიერ მისთვის ამ პუნქტის გათვალისწინებით მიწოდებული ინფორმაციის გაცნობის შემდეგ და მისი თანხმობის შემთხვევაში, სააგენტოს უფლებამოსილი თანამშრომლები, პირს უშუალოდ წარუდგენენ (მისამართზე ან თავშესაფარში) მომსახურების გასაწევად საჭირო დოკუმენტებს შესავსებად და ხელმოსაწერად (განაცხადის ფორმა, ხელშეკრულება, ქვითარი და ა.შ.), რომელთა გაფორმებისა და ამ წესის მიხედვით საფასურის გადახდის შემდეგ, განხორციელდება შესაბამისი მომსახურება.

მუხლი 8. საფასურის გადახდის წესი და პირობები

1. ამ წესით განსაზღვრული მომსახურებით სარგებლობისათვის პირი ვალდებულია გადაიხადოს ამ წესით განსაზღვრული შესაბამისი საფასური.

2. პირის განცხადებას თან უნდა ერთვოდეს გადახდის დამადასტურებელი ქვითარი/დოკუმენტი ან სხვა ინფორმაცია.

3. საფასური გადაიხდება წინასწარ, ნაღდი ან უნაღდო ანგარიშსწორებით, შესაბამისი მომსახურების გაწევამდე, გარდა ამ მუხლის მე-4 პუნქტით გათვალისწინებული შემთხვევებისა.

4. ამ წესის მე-5 მუხლით გათვალისწინებული დაყოვნების საფასური, ასევე ტრანსპორტირების პროცესში პირის თხოვნის და მის მიერ დასახელებული ობიექტური გარემოებების საფუძველზე, ტრანსპორტირების მარშრუტის ცვლილების შედეგად გაზრდილი ტრანსპორტირების მანძილის



საფასური, 6¹ მუხლის მე-4 პუნქტით გათვალისწინებული საფასური და 6² მუხლის მე-7 პუნქტით გათვალისწინებული საფასური, გადაიხდება შესაბამისი მომსახურების მიწოდების შემდეგ, ნაღდი ან უნაღდო ანგარიშსწორებით, ფაქტობრივად შესრულებული სამუშაოს (დაყოვნების ხანგრძლივობის, გაზრდილი მანძილის ოდენობის, დაჭერილი ცხოველების/ქვეწარმავლების რაოდენობის შესაბამისად) მოცულობის საფუძველზე.

5. ანგარიშსწორება ხორციელდება საქართველოს კანონმდებლობით დადგენილი წესით.

6. ამ წესით გათვალისწინებული მომსახურების მისაღებად განხორციელებული ანგარიშსწორების მართლზომიერებაზე/სისწორეზე პასუხისმგებელია განმცხადებელი.

7. არამართლზომიერად ან/და არასწორად განხორციელებული ანგარიშსწორების გამოვლენის შემთხვევაში, განხორციელებული მომსახურების შედეგები ბათილია.

8. საფასური ჩაირიცხება სააგენტოს ანგარიშზე.

ქალაქ თბილისის მუნიციპალიტეტის საკრებულოს 2017 წლის 24 თებერვლის დადგენილება №3-17 - ვებგვერდი, 01.03.2017 წ.

მუხლი 9. გადახდილი საფასურის დაბრუნების წესი და ზიანის ანაზღაურება

1. თუ საფასური გადახდილია ამ წესით დადგენილ განაკვეთზე მეტი ოდენობით, საფასურის გადამხდელს უბრუნდება გადახდილი თანხასა და ამ წესით დადგენილ განაკვეთს შორის სხვაობა.

2. გადახდილი საფასური მთლიანად ბრუნდება, თუ:

ა) სააგენტო სათანადო ობიექტური საფუძვლის (მატერიალური საშუალებების ტექნიკური გაუმართაობა, ექსტრემალური ვითარებით ან სააგენტოს რეაგირებების ღონისძიებების მკვეთრი ზრდით განპირობებული მოუცლელიობა და სხვა) არსებობისას უარს აცხადებს მომსახურების განხორციელებაზე;

ბ) პირი მომსახურების შესახებ განცხადების წარგენამდე მოითხოვს თანხის უკან დაბრუნებას;

გ) სააგენტომ მომსახურება არ განახორციელა ამ წესით დადგენილი პირობებით.

3. თუ პირი ვერ მიიღებს მომსახურებას მის მიერ გადახდილი საფასურის შესაბამისად მოთხოვნილი პირობებით და სურვილი აქვს ისარგებლოს სხვა პირობებით, რომლისთვისაც ეს წესი ითვალისწინებს განსხვავებულ (ნაკლებ ან მეტ) საფასურს, მაშინ პირს, შესაბამისად, დაუბრუნდება სხვაობა ამ ორ საფასურს შორის ან დამატებით გადაიხდის სხვაობის საფასურს.

4. ამ წესის გათვალისწინებით, გადახდილი საფასურის ნაწილობრივ ან მთლიანად უკან დაბრუნება ან მისი გამოყენება იმავე ან სხვა მომსახურების მიღებისათვის, ხორციელდება პირის განცხადების საფუძველზე, რომელიც წარდგენილი უნდა იქნას შესაბამისი საფუძვლის წარმოშობიდან არაუგვიანეს 3 თვის განმავლობაში. საფასურის დაბრუნების მოთხოვნის შესახებ, განცხადებას თან უნდა ერთვოდეს გადახდილი თანხის ნაწილობრივ ან მთლიანად დაბრუნების კანონიერი საფუძვლის არსებობის დასაბუთება, თანხის გადახდის დამადასტურებელი დოკუმენტი და დასაბრუნებელი თანხის მისაღებად გამოყოფილი ანგარიშის ნომერი. სამთვიანი ვადის გასვლის შემდეგ, თანხის უკან დაბრუნების ან მისი სხვაგვარად გამოყენების შესახებ მოთხოვნა დაკმაყოფილებას არ ექვემდებარება.

5. გადახდილი საფასურის მთლიანად ან ნაწილობრივ დაბრუნებასთან დაკავშირებული საბანკო მომსახურების ხარჯის გადახდა ეკისრება საფასურის გადამხდელს.

6. ამ წესით დადგენილი ცალკეული მომსახურების გაწევის/მიღების პროცესში, მეორე მხარისთვის მიყენებული ზიანის ანაზღაურების პირობები და წესი დადგენილია საქართველოს კანონმდებლობით.

